

摘藻堂四庫全書薈要

集部

欽定四庫全書薈要

集部

明文衡卷八十四

五

詳校官候選知縣臣吳甸華



欽定四庫全書薈要卷二萬二百三十七

集部

明文衡卷八十四

明程敏政編

墓誌銘

翰林應奉唐君墓誌銘

蘇伯衡

翰林應奉唐君處敬年四十有四以病卒于濠之瞿相山其孤之淳奉骨歸越祔于山陰縣承務鄉赤土山先塋之次而為狀授使者將圖其不朽於伯衡昔歐陽子

深慨夫文之復古者難得其人又謂學者文章見用于
世鮮矣況得施於朝廷而又遭人主致治之時乎君之
文可謂無媿於古矣亦既遭逢盛際而用之朝廷矣然
未究其用以一晷之故至廢為耕民而困頓以死其文
章迄不得施諸典冊遂使一代之詔令不能追還三代
之盛是雖曰有命抑豈獨君之不幸歟故於其死也凡
知之者無不為之悲而至今論者猶為進退人材者惜
焉伯衡知君特深安可使君賁志地下而無一言以白

之君諱肅處敬其字也自號丹崖居士世為杭之新城人君之父始遷居越故今為越之山陰人曾祖文源祖榮貴父應麟母汪氏君生有異質敏而克勤幼從先生王萊山授毛氏詩比長兼通諸經旁及子史陰陽醫卜書數之學無不研究資為古文簡潔而雅奧律詩步驟盛唐樂府古詩上薄漢魏場屋之文特其餘事尤工篆楷深得筆意至正壬寅君充賦江浙中其選以道梗不得上春官省臣便宜授杭州路黃岡書院山長轉嘉興

路儒學正皇朝取浙西例起赴南京君以父憂東還洪武三年春用近臣薦召至京師纂修禮樂書其夏擢應奉翰林文字承事郎其秋科舉法行預考南京貢士有織文之賜其冬扈從東宮拜英陵有襲衣之賜又逾年夏以疾失朝參例免官歸鄉後例謫佃于濠則癸丑之秋而君以是秋至瞿相山卒於甲寅十二月六日而歸祔以乙卯七月二十四日娶汪氏子男一之淳也強學能文克世其家女一人早卒孫女二人尚幼所為文十

卷藏于家庶其不朽者在是伯衡無以加之矣銘曰
世所須而或乏駕駘以之駕馭材適用而不急騏驥不
免棄置故君之文足以華國而其身竟死於忙隸非人
之能不能亦世之貴不貴也悲夫

故元中奉大夫江浙等處行中書省參知政事
周公墓誌銘

至正乙未閩括之寇蔓延平陽且兩歲矣民之黥者跳
踉以相附和弱者不能自立於是四境之內胥而為盜

者十六七。荆東道宣慰使溫寧布來鎮溫求可屬任者。
僉薦公可宣慰。問所以可者。僉曰：公以門功補海口場
鹽司令。龍江書院通其治所久廢。無能葺。公初至。謁先
聖立勸竈戶新之柱。悉易以石。不半歲告成。亭民項德。
兄弟積為民患。以賂結權勢。前後場官少忤之。輒遭反
噬。公竟發其奸罪。論如法。海口之俗。歲正月千百為曹。
聚東郊擲石。謂之禳祈。傷支體不恤。有司痛繩以法。莫
能禁其來久矣。公懸榜約束之。無一人犯者。其俗遂革。

甫二年得羨鹽四千引以此知其可也宣慰曰即周司
令邪我習聞其人便宜命公攝行平陽州事而浙省左
丞托里特穆爾至自台先是公以副元帥吳世顯政乖
其方任用非人變在旦暮毒且及民詣左丞言狀請豫
為計不旋踵而陳安國弒世顯其所任治兵于平陽瑞
安者亦戕于賊悉如公言左丞由是器公倚公討賊安
民給以糧五百石勉令就職人皆以兵食不足沮公無
行公曰父母之邦也受命立行隨以所給糧賑饑民曰

事無急此不然皆盜也時平陽惟江南鄉阻江為塹鄉民自相團結賊不敢入境公以五月至江南屯白沙禮致大家使輸軍儲設法募丁壯為兵而訓練焉民既用命軍實具而兵日衆或請出師公不許人謂公怯公曰以新集之兵擊數年之寇苟不持重萬一失利損威重莫甚焉後將何以成功在兵書致人不致於人寇至擊之未晚八月劇寇李師金翁瑞突入黃浦江公勒兵渡江迎敵賊大潰斬其馘百餘而生擒數十人兵士請乘

利深入公不應俄大関公堅坐不動徐自定取其首謀者斬以殉而申明紀律遂移屯涇川寇來薄我三合而三捷復遣輕兵衝其後賊駭亂獲其酋金安三吳邦大邦大素健鬪衆之所恃至是獲之賊奪氣追北數十里殺獲甚衆獻俘于左丞仍以計誘致李師金翁瑞及他酋數十皆戮之而散其火伍歸農獨西溪寇恃括寇不下且請決戰糾括寇數萬直擣涇川公曰賊輕我矣今日必殄之部署其衆而下令曰勿擅動聞鼓聲則進望

其白旗下多精銳命士引弓齊發仆其執旗者鼓而進賊不能支自相蹂躪聲言勿殺我當投降許之張仲卿者即趨而前俯伏公撫而遣之還諭衆曰周知州知爾從賊出於迫脅不爾誅降無不宥不者擊爾盡乃已仲卿又盛稱公誠信人人喜曰有生意矣爭棄仗來降上功行省陞浙東道副元帥總制平陽瑞安丙申正月別寇葛兆出掠走之獲酋金龍十明年又出襲我覆之獲酋吳天雷等遂命弟誠德分兵擊下瑞安諸砦而歸其

民黃宗雲等之辟居平陽者進兵會括分院兵夾攻寇之抄平陽者破其窟穴惟吳悌五遁之福寧王賢五所括分院以誠德功聞于喀爾丞相授忠顯校尉同知平陽州事兼行軍鎮撫尋引兵趨象原以逼王賢五方置營而吳悌五領衆奄至誠德奮當其衝突吳悌五中矢其下負以走因其亂雜之僵尸數里未幾購得吳悌五併三恢酋鄭子敬送于閩省誅之經畧使在閩遣從事官工部員外郎曾堅分御賜酒勞之承制擢公行樞

密院判官自是平陽之人安於耕鑿以供租稅矣公曰
外攘之功粗立其益嚴內治之修乎壁於州南五里而
鎮焉革蠹弊平訟獄布寬政行義役與民休息浚河渠
若干里深丈有二尺廣倍之築海隄若干丈廣二丈崇
半之又興土木之功官署孔子廟學東獄行宮城隍祠
廣福宮悉復其舊內而布教條外而修職貢使者咸出
其途迎來送往禮無或遺雖廩無餘粟庚子夏聞京師
旱遣弟紹德漕運糧二萬五千石上供天子嘉之賜龍

衣一襲及上尊酒真授行樞密院判官階奉議大夫而
官誠德以昭信校尉温州路總管判官紹德敦武校尉
同知平陽州事麾下士錫命有差當是時方國珍姪明
善以樞判制溫公不為之下而明善收公屢軌以舟師
公屢却之然自念彼不有朝廷況有鄰州乎且彼據三
郡而吾以區區一州與之抗終非萬全之計進父老語
以故欲委地去聽民自為去就父老曰方虎狼也公於
我等數年安全之一旦以遺虎狼忍乎公若終惠我等

幸與之修睦公用父老言遣弟明德往謁拘留不遣辛丑夏遣都事張君錫漕貢如初天子益嘉之進朝列大夫同僉行樞密院事降分院印明善舟人在直沽者欲奪印不克壬寅春遂以三千餘舟列營平陽瑞安公四面受敵激諸軍以忠義人皆感奮屢挫其鋒又遣没人斷其碇纜乃解去追獲舟二百會集賢院都事興通持詔來勞公乃遣都事蕭天瑞從詔使入貢謝恩且進地圖表言國珍侵軼乞注代天子覽表為下詔讓國珍仍

有龍衣御酒之賜超拜中奉大夫江浙等處行中書省
參知政事刻分省印使佩之以承德郎行樞密判官官
誠德國珍被詔大怒調台慶溫之兵來攻相持閱六月
陰啗公帳下林淳以厚利使為應三郡兵攻其外淳應
於內九月平陽陷執公及誠德紹德以去誠德慢罵明
善遂遇害剝其皮焉至死罵不絕口紹德則縊以石而
沈諸海送公國珍國珍甚禮公好語公曰省臺貴臣皆
聽吾命公獨敢我抗豪傑士哉自今與公釋憾其仍為

參政我所公曰我與爾有不共國之仇而與爾共事乎
然國珍終不敢害公越三年王師取台慶公與國珍例
遣赴南京後公以誠意伯劉基言得放還田里洪武辛
亥大臣行邊者復遣赴南京其秋八月壬寅卒于南京
享年六十有六後十月壻顧克敏歸其柩平陽以甲寅
十二月甲辰葬於睦嶺之原公諱嗣德字宗道姓周氏
平陽人宋江陰軍節度推官元贈中順大夫淮東道宣
慰副使上騎都尉追封永嘉郡伯汝臨之曾孫元累贈

大中大夫河南路總管輕車都尉追封永嘉郡侯雷轟
之孫元大中大夫同知浙東道宣慰使司副都元帥致
仕贈同僉太常禮儀院事輕車都尉追封汝南郡侯謚
康惠應奎之子也曾祖妣張氏追封永嘉郡君祖妣翁
氏妣游氏並封永嘉郡夫人妻顧氏封永嘉郡夫人次
陳氏其壻永嘉陳聰奉事狀求伯衡銘其墓昔我先君
以江浙省左右司都事佐戎于括公無月不通問伯衡
不敢以不知公為辭乃為叙而銘之銘曰

元運將終並海之邦自租自稅大憝氏方海邦之民亦
孔之痲頭箕會斂擢筋監髓眷茲平陽于方咫尺虐燄
炎炎何以不及文武周公厥猶克壯天矜于民俾作保
障公未至止豈無州牧鄰冠橫行曾莫敢逐凡厥士女
東竄西匿寢食不遑矧暇耕織公既至止奮其戎兵招
降討逆內謐外寧凡厥士女有室有家爾藝黍稷我種
桑麻相時倉廩枵然空虛謂公蹶蹶公則舒舒征從其
薄刑用其輕追還舊觀百廢具興先聖之居明神之廬

出治之所棟宇渠渠憂彼水旱為民之病以畚以鍤河
渠攸濬虞彼潮汐為民之患迺疆迺理作之畔岸維民
休戚係公存亡公構閔凶孰不痛傷昆山蒼蒼不崩不
墜公功巍巍克類克對我采民謠勒碑墓道無曰不顯
終古有耀

故元温州路同知平陽州事孔公墓誌銘

至正末方國珍據台慶溫用名士以收人心凡士居其
地者不為所用則為所禍而其於公也不得而用之亦

不得而禍之四方之士聞而莫不高其風國初胡仲淵以王府參軍鎮括將進公于朝而先之以書幣公返其書幣謂使者曰使孔暘一出足為天下重雖強顏從參軍後亦不辭不然何益況吾父年垂九十不可頃刻去左右參軍奈何欲使之胥為不忠孝人耶仲淵愧其言而止洪武元年按察僉事趙壽將使指求賢浙東得公於溫以應詔公終辭不起士益以是高之公神明之胄起家為名進士仕州縣為良吏師學為儒宗當世尊而

仰之不在彼而在此也公自幼篤志於學警悟強記絕人而諸經史百氏之書罔不該貫取元統乙亥鄉薦溫之士以春秋貢者自公始方上春官而科舉廢南歸以衍聖公思晦舉署永嘉書院山長未上而科詔復下至正元年再薦于鄉登二年進士第擢衢州路錄事階將仕郎九年轉從仕郎處州路慶元縣尹代歸以二親年高絕口不言仕進十九年中書參政布延布哈公內臺治書李公國鳳經畧江南得便宜除拜承制授公溫州

路同知平陽州事使得便養公奉檄欣然而起其為錄
事於衢也下車適大旱以郡守命禱徐偃王祠下未復
命而雨如注莫不驚異民汪明之兄弟爭家財吏展轉
求賂數歲不決公問汪曰兄弟親孰與吏汪對曰兄弟
同產吏途人爾公曰弊同產以資途人汝何不思之甚
邪其兄弟立感悟叩頭曰不敢復煩官府矣廉訪僉事
博拜公行部莅衢委以難決之獄凡所平反無不服其
明允遂以最聞朝廷遣使分道宣撫過衢得公治狀甚

禮遇之其為令於慶元也會分憲余公闕以括賦役不均舉行覈實各縣皆擇人往董之惟慶元就以屬公乃令民以田畝多寡自占即不實罪及隣保立法周而用法嚴民自占無敢不以實賦以田制役以賦定富者幸免貧下重困之患遂除余公自為書遣吏勞以公堂酒學宮在縣西大溪之北公始視事進謁阻水不得前聞舊有詠歸橋直神力院左廢且數十年即經營興復之六月而成其脩七百尺其廣三十尺覆以屋為間四十

有九來往者便之壬辰歲侵縣西鄙小民六十餘人稱貸於富民弗從強委劑而發其廩以去富民忿之訴公以為強劫公惻然曰彼艱食冀活性命乃爾情亦可矜矣今以其活性命者戕其性命吾不忍為也若何獨忍乎富民愧謝而退閩寇犯縣境公能以義兵擊退之民賴以安急於仕者率縛平民徼賞典公曰軍功與民命孰重輒解其縛而縱之平陽鄉邑也時行樞密院判官周嗣德行州事公不矯以為異不比以為同事無大小

一裁以法雖族姻不少假借之君子稱其識大體為平陽三歲丁母恭人憂解官明年州人以版圖上于職方公與陳子上者慨然有浮海之志顧父判府公在堂子上入闕公羈孤無儔却掃一室名曰潔庵情有所觸俛仰書空而已後三年而判府公捐館公年六十三而執喪哀毀又十六年公以疾不起洪武壬戌七月二十七日也得年七十有九臨終謂諸子曰吾今而後有以下見曾大父于地矣蓋公之曾大父曰景行宋太學內舍

生度宗幸學循故事官先聖子孫賜同進士出身授慶

元府學教授陞從政郎主管禮兵部架閣文字宋亡不

復仕是以云架閣之子曰士璘元永嘉縣學教諭後以

子貴贈從仕郎曲阜縣尹曲阜之子曰火用翰林鄭公

陶孫薦歷永新州學正龍溪書院山長江州路儒學教

授湖口縣主簿慶元會稽兩縣尹以承務郎松江府判

官致仕公其嫡也諱暘字子升生於大德甲辰正月十

九日母恭人許氏湖廣儒學提舉澹齋先生善勝之女

娶王氏封恭人以大德丙午三月十一日生以洪武己卯十二月三日卒葬縣西之輦輿子男五人諡說詳訓王出也誌側室陳出也詳訓早亡女三人皆已行而卒孫男四人宏寔邃瑩女七人長適林與方次適項愉餘未行平生所為詩文總十二卷曰潔菴集藏于家諡等卜以十六年癸亥十一月十日合葬于輦輿屬其門人蒙陰縣主簿林與直為狀來請銘伯衡晚陋不足以知公竊窺公當運去物改之後不降其志而得明哲保身

之道善於用晦而不失出處去就之義可謂無愧古之
仁人矣論次而顯銘之百世之下寧不尚有觀感而興
起者乎銘曰

恂恂孔公宣聖之孫道深皇王學貫天人宏中肆外而
鳴以文迺旅俊造迺充國賓迺綰章綬有社有民敏於
為政一本於仁世運俄否歸伏海濱大明受命萬國維
新求賢有詔使者在門引疾堅卧耳若不聞所執者節
匪潔其身優游令終允矣全臣肇興之原巍然丘墳勒

銘于石千載弗諼

魏夫人宋氏墓誌銘

高啓

蘇州守江夏魏公以其先太夫人行迷授渤海高啓曰
吾妣棄吾二十有二年矣遭時多故權厝先塋之左今
始得地於吾里黃岡湖東某山之原將以某年某月某
日而葬子為我志而銘之公昔掌國史啓嘗為其屬令
又居公之野辱以先銘是屬不敢當然亦不敢辭也按
夫人姓宋氏武昌蒲圻人宋彈壓官諱時慙之孫女諱

某號俊齋之女同邑隱君子碧崖魏先生諱雲瑞之妻也夫人生而穎異七歲能誦曲禮內則曹大家女訓十歲共女事無闕既長歸先生先生故名家世儒履行高潔夫人相之稱賢配焉居母姑之喪皆過哀疏食終三年待內外親族無異意先生嘗遊齊安遇疾卒於邸有子三人法孫已孫虎孫初聞訃將遣法孫迎喪或曰江多蛟龍性惡屍以柩渡虞有變宜焚骨歸也夫人哭喻法孫曰是將陷吾母子於大戾也爾忍而父為灰燼乎

亟往毋有憚而父善人神必相之矣迄渡風浪帖然喪
既還或又曰柩入家弗利夫人曰此固吾夫宅也舍之
使何適哉苟有弗利當萃未亡人之身未亡人得從夫
于地下足矣即惟正堂奉安旦夕哭臨逮葬毀瘁幾不
能為生嘗謂諸子曰不幸門戶凋落汝父汝伯相繼歿
若曹尚誰賴哉宜力學善自立大汝家以慰老人之望
毋從里中兒嬉也子皆承教惟謹先生庶母羅氏性素
嚴號難事夫人始終奉承有順無忤疾則侍粥藥歿則

營喪葬皆必誠焉已孫既娶久未有胤夫人曰吾老矣
獨不得一抱孫也禱于先夢紫衣人種粟舍垣下告曰
此萌也為他日興植汝門之本覺旦語已孫曰汝有子
祥也既而果生男夫人喜曰神不我誣遂以粟名嘗得
眩疾既間曰吾度不能久處人間矣命舁柩堂下沐之
曰吾藏身此中無隙則佳耳又命新婦取衣衾當斂者
縣之櫬餘悉散諸親愛除夕家人進椒酒夫人起居尚
無恙元旦坐堂上親戚為壽畢曰我明日逝矣為我謝

某謝某翌日沐浴更衣坐呼已孫等謂曰吾年七十六
壽亦足矣死自吾順汝曹勿號慟亂我聽使我得好去
也語已遂殂實元至正十年正月二十日也法孫蚤世
虎孫仕元為岳州路儒學正平江州楊柳灣茶司提領
亦先卒已孫今名觀即公也仕國朝歷太常卿翰林學
士國子祭酒至今官嗚呼夫人貞孝慈睦其賢卓著如
此固非凡婦人所及至於聽言不惑臨終不亂則又士
君子識義理者或有所未能而夫人能之豈非難哉雖

生不及見子之貴以享其榮養然死而子能以儒學際
聖朝爵三品當得褒贈之命象首錦橐以光賁於寔
又能追述懿行以圖不朽則夫人何憾焉銘曰

維君子嬪貞以提身能教其孤為今名臣卒既有年始
歸斯阡時虞未遑豈曰緩焉乃刻銘章載揚幽光永固
以安夫人之藏

長山先生胡公墓銘

吳沆

金華文獻邦異時碩儒魁彥踵武迭興或以道德鳴或

以文章顯或以氣節著聲稱當時名載簡冊若乃接前
修之緒為後來之倡則長山先生胡公其人也先生諱
翰字仲申世金華人在宋有諱漢者以學行聞於鄉號
南岡處士先生曾大父也大父諱伯起父諱英仕元為
太平路總管府照磨兼架閣事莅政有績先生幼聰睿
甫七歲志氣即與羣兒異一日於道中拾鏹若干緡不
敢去坐候遺者至而還之歸告母夫人何氏夫人奇之
益督以學既長侍架閣君宦游蘭溪從禮部吳公學公

一見即期以遠器繼從吳先生於浦陽博覽經史靡所
不究又登文懿許公門南北士在講下者皆願與交復
以所著文進之文獻黃公待制柳公二公稱贊不容口
翰撰張公於文最少所許可見先生之文無異辭也是
時文治方興輦轂之下英俊雲集先生游焉見其人而
誦其文者莫不稱嘆有勸之仕輒謝之遂過廣川弔董
生謁曲阜拜孔子墓而歸先生於當世名公卿多所交
接惟武威余公闕宣城貢公師泰號知己遭時多虞四

方兵起避地南華山中著書自樂大明開天皇上帝駐兵金陵招羅賢才遣使聘先生會有以金華民籍田出兵者先生從容進曰金華民素儒不習軍旅藉以為兵徒費廩粟耳上可其奏即罷之授衢州教授洪武乙酉奉旨纂修元史入局撰英宗睿宗實錄及拜住丞相等傳凡若干卷賜白金文幣以歸素嗜山水晚歲愛北山泉石佳勝卜居三洞之上竹林之源幅巾短杖徜徉終日或乘興入城府訪故舊則留連數日先生生元丁未十

一月初三日卒於洪武十四年正月十日年七十有五

娶謝氏蚤世再娶衛氏皆無子以姪溥為後衛氏先卒
先生葬之靈源市阜後二年合葬焉所著有春秋集義
有文曰胡仲子集詩曰長山先生集先生既沒其門人
徐恒狀其行致其猶子濬之與其孤之請俾余誌其墓
先生稟高明卓絕之資為精敏宏博之學得於心而證
於人稽於今而質於古為文章簡潔清峻不作則已作
則必高出於人性嚴毅寡酬應未嘗輕有所毀譽暮年

請文者踵門不苟隨也曹國李公在大臣中號尊賢下
士於先生待以殊禮每欲以先生名達上前知先生老
病不强也聞先生卒嗟嘆久之沈之生也後先生十有
七年先生不鄙而友之比年來數奉談笑相知為深叙
先生之行而銘之宜有不得而辭者矣況門人弟子千
里有請乎銘曰

嗚呼先生文之雄也山川孕靈秀所鍾也沈浸經籍包
羅古今至和含中大振厥音五行麗天芒寒色正朱絃

在廟肅然其聽先生之學豈止於斯命之不達竟老而
衰學傳於人言垂於世生宇宙中何忤何媿金華蒼蒼
靈源泱泱先生之名與之俱長

故福建儒學副提舉王公墓誌銘

貝瓊

宋之南文獻故家多萃於四明而世其學者有王公叔
載焉蓋自厚齋尚書倡學者以考亭朱子之說一時從
之而變故今粹然皆出於正無陸氏偏駁之弊而叔載
又能守之不失嘗讀臨濠教諭鄭真所著遂初老人傳

其言行鑿鑿可考遂初者叔載所自號也然不獲一試
以終遠近悼之既葬之明年其子陞謀立石墓道而以
文詞顯于今而信于後者莫若國子助教貝瓊乃授狀
并書於使者來中都為請曰惟是不肖孤方斬焉在哀
經中不得匍匐走謁館下惟先生哀而銘之庶先人死
且不朽而尚書公亦有光焉余辭不獲遂次第而為銘
按狀公諱厚字叔載姓王氏其先瑯琊人至宋徙居開
封高祖安道保信軍承宣使靖康之變扈從南渡始家

于鄞曾祖撫吏部郎中崇政殿說書祖應麟中寶祐博
學宏詞科歷事三朝官至翰林學士禮部尚書號厚齋
父昌世承務郎人皆稱承奉公黃文憲公為志其墓曾
祖妣某氏祖妣舒氏戴氏皆贈碩人母楊氏公幼而知
學八歲能賦詩讀書日記數百言十歲已竟論孟詩書
禮記并閱尚書深寧集習經義詞賦操筆立就鄉先生
王僉判叔龢趙太博孟何戴教授表元聞而異之因就
見焉元延祐初科制行改治詩經初李國博元白授詩

於舒文靖公璘王與舒李世親盡得其源委久益充積
博洽凡性命治道禮樂法制及臺閣典故世胄譜牒鄉
里多咨問之袁文清公桷自翰林居里第輒問所學對
曰近於濂洛關輔建安西蜀諸書稍已通習惟讀書記
衍義正宗意有所得以其明潔縝密有成法易知而可
守也因言世之學者稍涉朱子數書輒詆淳熙諸老與
朱子同時其言論雖不盡合而博聞實踐為所推許今
人耳目所不及乃藉口理學以文寡陋高談闊視漸成

虛誕之風先生宜懲其弊以新士習文清著四明志命公分撰二考且言子家世太史亦嘗究心否曰經與史同出異名古有編年司馬氏為記傳隋志始稱正史非古也作史必曰三長年代協體統之會人物萃品題之歸叙事貴詳不為繁修詞有要不為簡彼謏聞寡見雜出衆手舛訛遺漏欲以傳信久遠豈不難乎因歷舉累代高下得失甚備文清大喜復閱其文作而嘆曰先師之道茲不墜矣嘗為郡庠訓導演說名理辨析疑難諸

生悅服往時博士朔望講義就章立題卒一篇而止公

病其拘取四書五經關世教者為之直說抑揚反復間
者竦然嘗三試不偶即棄去舉子業用詞學十二體為
古文本之三代兩漢博以唐宋諸家屬詞有法絕去雕
巧然時之知者蓋寡矣浙東廉訪司副使曾某署郡直
學公辭都司牟應龍謂之曰先儒謂錢穀亦為己之學
也迺就職塗田砂岸先侵於豪民者悉陳而復之盈考
宣慰司板授象山教諭考覈田租侵漁者不復逞調浦

江教諭踰月即去官歸奉母時朝廷遣大臣李國鳳經
畧江南以便宜用遺逸有司以公名上即署衢州路教
授而中書復用外臣薦除邵武路教授福建分省又陞
為儒學副提舉皆不起既老嘗語人曰天地生人之初
吾不得而知也可知者理而已理之在人初非不善克
遂其初斯足矣乃號遂初老人云尚書富於著述玉海
最為詳洽未脫藁而失後復得之中多闕誤公考究編
次請于閫帥鋟梓并他書十二種以傳表文清公所撰

四明志或有讒于僉事苦思丁將毀其板公白太守王
元恭曰素公中朝名臣書法高古不可毀也元恭持書
以進僉事驚悔命與舊志並行公為成績志若干卷鄉
飲酒禮久廢太守用程先生端禮言屬公與鄭先生覺
民考訂一遵儀禮用賓興歲行之以經費不足而田為
吉祥寺僧所據白諸有司僧以田歸我歲入遂充其禮
浸盛觀者謂紹興以來昉見於此而先王之教猶存也
公天性質直人有過則面折至發赤品別人之賢否不

以勢位高下為輕重不以待遇厚薄為是非送死厚於
奉生恤小篤於事大報德甚於念惡勇退急於趨進晚
年益以詩酒自娛客至論宋季事疊疊不倦且及至正
史官詮次弗當欲為釐正尤極論奉化陳桎續通鑑前
後之失有遂初藁三十卷藏于家戒其子陞隲曰承家
不在名位而在不失身敬身不在外貌表襮而在毋自
欺讀書當貫古今處世必審進退其有同流合汙以為
通矯時干譽以為高患得患失以終其身者此吾所深

惡非所望於汝也大明洪武九年丙辰三月十日卒享年七十有七妻史氏系出相家與公合德先公卒子二人長陞次隲隲為弟寧孫後寧孫通春秋詩二經蚤卒無子遺命與同葬女一適戎某孫男一初孫以是年四月十四日葬于鄞縣先塋之右與史氏合兆嗚呼四明之學惟尚書之廣博精深論者謂兼東萊西山二家之長非素楊所能及而公克繼其傳雖不見之所施足以垂後無疑也故特掇其大槩而事之具于傳者可畧銘

曰

王氏之先世居瑯琊再徙于鄞繇儒起家建尚書公耀其光彩所蓄之富浩乎淵海昭昭大中或為異同倡而正之畔者斯從偉哉叔載克紹于後遺編佚藁既習而守人亦有言惟祖惟孫不襲以爵道實惟尊紛紛黃小得失寧辨本棄末務內忘外鍵三年象山遠近是咨大夫有友學者有師時既不偶宜退奚久日遊以嬉託意詩酒慨彼里豪貪縱鴟張盈必易覆烟消雨茫惟吾遂

初初豈不善年踰七袞雖晦益顯鬱鬱堂封在彼高原
式衍餘慶以利後昆

明文衡卷八十四

欽定四庫全書薈要卷二萬二百三十八

集部

明文衡卷八十五

明 程敏政 編

墓誌銘

國子祭酒宋公墓誌

劉三吾

國子祭酒宋先生卒既往哭弔居數日博士吳守德持
學正朱惟嘉所狀先生行實來曰先生嗣子麟疚在苦
次不得跣以請茲將歸寔滑之永寧片惟翰林兄長吾

于先生為同舍故懇銘焉尚憶走始來時會先生于春坊先生曰得毋與鰲長吾為兄弟耶不然何而貌之相似也相與感歎久之嗚呼先兄以後至元丙子入監周旋十有五年中間纔兩歸江南爾在監舍法以同時為兄弟以兄弟相知為世契則走于先生忍銘忍不銘按狀先生姓宋氏諱訥字仲敏世本衛之山陽人後徙滑家焉兩世繇貤恩贈嘉議大夫禮部尚書上輕車都尉追封京兆郡侯諱德仁其曾祖贈中奉大夫河北江南

等處行中書省參知政事護軍追封京兆郡公諱宣其
祖官中奉大夫陝西諸道行御史臺侍御史贈推誠秉
義守正功臣通奉大夫江淞等處行中書省參知政事
護軍追封魏郡公謚忠肅諱崇祿其父忠肅在元時駁
歷中外四十餘年五持憲節逮事七朝豐功盛德所以
燾後衍慶神道碑紀之悉矣先生濡染家教動以矩矱
雅性遲重不妄言笑齒貴胄館以來所師宗工碩儒月
開日益卓然有成擢科登仕為時間人中經繹騷乃被

褐懷寶以自韜晦皇明受祚徵詣公車召見次有言動
聽洪武之十三年也是冬除國子助教橫經發難擊節
廓塞學者如客得歸嘗同諸儒應制撰勅文畀僧道錄
司領教事者十有六通操筆立成雅稱上意超授翰林
學士奉議大夫俄陞文淵閣大學士日見親信有所補
拾會時大學成中外歲貢學徒日夥而職大司成者往
往巽懦師生相訐教尼不行宸衷簡注擢為祭酒陞朝
列大夫以釐正前弊上自製誥詞至以尚父興周八百

儼之感惟眷遇所以提挈鏟磳不遺餘力師道既立皇
心載寧乙丑戊辰兩科得士大率三天下之二而龍頭
魁選恒在太學大被賞遇一日有疾上遣中使致諭其
畧曰卿稟天命之性發仲尼之誠施己之幽德修道教
人所以病不病而速差以其有神也天章下賁光輝儒
紳恒謂祭酒骨格必壽適有畫工至命繪其像肖焉喜
溢天表然終老之以其子麟主望江簿特勅召之還俾
便侍養其被遇優渥類此方倚之以棟梁我道楷式諸

生也不謂得疾旬日遽不可起病也尚醫來治卒也遣
官致祭其文悉上所自製故事文臣四品無給喪費者
曠典之舉昉自先生斯皆異數也居嘗寢食恒在廂房
未始一宿于家及是疾革麟等託諸監官懇請其還厲
聲曰是何風雲氣少兒女情多況在丁社兩祭齋戒中
耶至是祭畢乃就昇歸一不口及家事及家氣絕焉二
月之三日昏暮時也嗚呼先生以八袞之年當易簀之
際而風雲為氣不少衰丁社兩祀始終齋戒是持非其

平日操存有素詎能方寸不亂若此哉可謂真大丈夫
矣撮其平生所哀集先世碑銘傳紀曰紀德錄一集所
自著述曰西隱集文十七卷既號西隱復別號所居別
業曰白雲茅屋自法書名畫外他無所嗜好中朝名鉅
詩若文讀一二過輒能記憶不減少時今皆已矣生以
元至大辛亥十二月四日卒以今洪武二十三年春壽
八十配康氏先卒子三人長衍祖即麟擢進士第拜監
察御史出主望江簿次復祖鄉邑訓導次安祖女一人

在室孫男三恕慧懋女孫四所適其人長郭謹次陳惟
新次李均一在室曾孫男女各二皆幼臨發柩時上再
遣祭舟車之費一出于官可謂生榮死哀也已銘曰

銅臺世家忠肅公挺生賢嗣遭時雍身逢堯舜接夔龍
代言文淵掌辟靡威惟皇上倚注隆率先條約自其躬
風雲氣槩冰霜容教行六館諸生從金石文章錦綉習
蔚為海內諸儒宗譽髦多士振文風棟梁我道伊誰功
夫何一疾遽告終至尊為之惻淵衷命醫與祭恩禮豐

年登八袞數始窮歸竈祖塋得幽宮銘阡者誰青藜翁
子孫世世其吉逢

王紹汶墓誌銘

劉夏

洪武二年七月余受命尚書來河南陝西兩省訪求前
元庚申皇帝天下州縣三十六年入史事跡其在河南
置局武成廟之側浙東士大夫王應璧見訪為言其先
祖紹汶字思齊生當宋末元初之際貌奇古美髭髯聲
音琅然聞于堂室家小嶼溪水環其屋壁門前松枝歷

逕梅竹緣坡又雜蒔蘭鞠風至則左右紛披有名帖千
卷書萬卷我冠大袖日課倍誦五經又旁通百氏之書
下筆千餘言立就及聞里中有大役則奮袂而興或造
公府不避是非利害必俟衆議歸於公正乃已臨終力
疾書曰利人之事可周旋處雖獨力亦當自為害人之
事於戲謔中雖一念不可妄發又書曰曉夜讀書閒暇
治家皆令刻板以垂示子孫娶陳氏子師古與秦女三
皆嫁士人孫三公培應璧公恕享年八十有六余聞應

壁之言矍然而嘆曰斯人也是乃蓄德君子宜有後者也富貴功名既不在其人之身則在其子與孫矣徐考之應壁其子名師古者有猷為有執守文學議論幾冠儒林然不肯仕其孫名應壁者十八歲游幽京歷仕至廣州總管推恩封贈紹汶中順大夫江浙等處行中書省理問官上騎都尉追封天台郡伯嗚呼為善無不報要於久而後信觀王氏祖子孫三代豈不固然與銘曰炎炎者勢翕翕者利閭閻崛起朝躋夕替所以古之公

族大夫必尚論其世也

許士修墓銘

方希古

天台方孝孺有篤志尚德之友曰許君繼字士修言必出乎正動必由乎禮趨舍取予咸則乎古之君子而無所苟其精思力學以求道德性命之蘊汲汲若或失之而有得乎心沛然以樂不以貧賤患難惑其志余取友二十年所交海內知名之士甚衆考其所存莫有類吾士修者蓋其操志勇自守介所期者遠而務踐乎事所

造者深而其心欲焉如未有得使假以壽年其所志當
卓絕過人而年僅三十有七而卒嗚呼此豈特斯人之
不幸耶士修之先汴人其六世祖景元宋高宗時

闕

州教授遂家焉後徙寧海為寧海人高祖文正曾祖彬

祖

闕

父琳皆業儒而不仕士修質高明自為兒童已有

成人之志以學賢哲自勉喜為詩其高妙處有魏晉人
格韻別自號觀樂生其詩多道其所樂言暢而旨深非
近世人之所及也或傳其觀樂九詩至京師翰林學士

金華宋公見而嘆賞之以為不愧古人凡一時名能詩者皆自謂弗及而士修不自足益刻意經學玩心天人究蹟探微將大索六藝之緒反之於約以成身致用而病作矣既病咯咯然嘔血而學不止病凡三年每見心覺其進瀕死精神不亂與人言死生晝夜耳奚足怪談笑而逝嗚呼士修之於斯道非篤信不惑其能然耶初士修學於鄉先生王君蘊德王君奇之妻以女弟生一子曰籀二女曰忠曰惠王君固名士其弟琦尤與士修

相好士修以洪武十七年正月二十六日卒琦述其行
為書託予銘予謝曰子兄弟與士修善銘莫宜焉奚予
之求後五年王君仕藩邸死琦亦謫去士修弟顯將以
某年月日葬某山來連銘於是士修之親友盡矣予尚
誰辭銘曰

學失其統驚于空言飭外以欺幾忘本源嗚呼士修志
篤行邵惟正之趨非義弗蹈暨暨其守汲汲其求棄遺
分華獨與道謀業雖不終世罕厥似我庸闡微以勗髦

士

皇明故通奉大夫晉相府右傳桂公墓誌銘

并序

王景

洪武二十年十二月某甲子晉相府右傳桂公卒享年六十又七明年正月某甲子葬于董粵之原循先志也又明年其子慎奉其友韓宜可狀來請銘不獲辭公諱惠稱字彥良以字行從幼不羣聞長老道經訓則嗜若醇酎既冠通經史百家言鑒秋闈中之不得志于南宮

歸長包山再長高節皆有文名除平江路文學掾不就
威孤不弦繩俚荒蠹公以六籍橫驚大肆伸儒遏暴方
氏連甌越來辟立謝之聚徒山中嚅噤道真涵泳聖涯
曰吾以待天下之定也皇明天造反刈剗偽一歸于正
洪武紀元觀風者以名上省憲交辟不起六年大徵天
下士行省復以名聞待詔公車厠于數千之列唯公得
以白衣錫宴除皇太子正字授承事郎侍講六年顯仁
闡義出周入孔興衰治忽敷啓剴切東宮深器之會文

華堂給事不飭勅公啓迪曰昔許魯齋諸生多為宰輔卿其勉之及侍宴以御製勅訂正以聞詔以治道公曰道在心心不正則好惡頗好惡頗則賞罰差賞罰差則太平未有期也是以君人將忿欲是務去明年日南至有事于圓丘以祝文譴主者公曰予小子履湯用于郊我將我享武歌于廟以古率今未足深譴上笑曰卿動援經史屢聞獻替稱善久之嘗有以墨敗官者賜死公力諫如律不聽公但曰三尺法當與天下守之上頷之

滋欲試以事以三府疑獄命之讞以情原者若干人翰

林以失儀見呵公奏當取長畧短上曰不然吾因其長而拔其短以造其全時方以法繩下訪曰法數行而數犯奈何對曰用德則佚用法則勞勞以靖民則民勞而弗靖德以靖民則民靖于德矣他日與林溫同侍上曰卿何官曰正字上曰卿帝者師也其為上所屬類如此十一年除晉相府右傳授通奉大夫內出勅文以孔孟期之在官責重望尊治出聲生府告無事王益重之政

多決焉公謂王者一正心而國定因進心圖以明之十三年革相府改長史授奉政大夫以疾謝詔許之十五年朝京師上太平十二策奏報十八年勅歸鄉里五世祖萬榮宋寶章閣學士知常德府高祖某宋宣議郎曾祖康老宋富陽知縣祖俊卿贈嘉議大夫浙江鹽運使父與紹贈中奉大夫浙江參政初公元中書右丞葉文簡公之孫判慶元府同之子也生而室有火光熒如流星以為不祥出之參政公子之娶岑氏早世二男子曰

抗曰智皆天再娶于陳封夫人至孝持身治家內外井
井不以貧疚不以貴驕先公卒享壽五十又七與公同
墳異藏生慎及全慎仕為中書舍人公平生純一見道
處官若家尤不以貧富動心仕止進退不亟不紆坦坦
施施及與人交命觴詠詩蹕厲風出窮日夕不厭人以
春風和氣目之其著作有和陶集春和集清溪集知足
集凡若干卷嗚呼甚矣儒道之有裨于世也身用之則
榮家國用則寧天下用以平公自結髮戰藝以功名終

將何修而致是哉亦唯道而已矣嗟乎道之為用閔矣
銘曰

不詘而伸其道允藏不樸而文其德不爽天球在序金
奏在宮聿諧其施以褫匪躬既燼其英亦碩其聲育閔
其羸繄後之成

戶部尚書郁公墓誌銘

解縉

永樂三年八月五日戶部尚書郁公薨于位上遣官祭
以文命工曹具櫬輟朝一日顧翰林學士臣縉等歎息

稱其才嗚呼公之哀榮始終固可美國家所以待臣庶
恩禮之厚尤足以激勸於當世公之子孫豈不永有庇
賴歟於是其子彬衰麻踵門泣而致公之治命請予銘
其墓噫公與予交二十年未嘗爾汝褻狎亦未嘗挾長
殺敬禮予二人者亦自信為誠實洪武二十二年予侍
講華蓋殿中公始受命為戶部度支主事賜名新明年
改戶部司屬二十三年陞北平部郎中二十四年六月
超授嘉議大夫戶部右侍郎考滿上於庭中稱譽擢尚

書授資善大夫十三年于茲矣非才而能之乎抑公之
盛福其祖考以來積累之慶非偶然而致也公家素饒
財慷慨豪舉不為齷齪喜賓客樂於賑窮乏不為德色
洪武中奏事庭中被顧問天下戶口漕運地里險易計
數時日應機響答無遺謬自謂劉晏以下不論也晚歲
多疾乃時在告上甚憐之公亦時自語予吾覺衰老恐
旦夕先朝露不能報國恩吾平生無卓異惟君知也幸
與之銘其墓紀其榮遇而已嗚呼公非可謂達歟公蘇

人也曾祖仲和祖瑜父德字銘本公以至正丙戌正月
十四生於吳縣洪武元年祖父遷居鳳陽臨淮縣公隨
而家焉公娶嚴氏綜理家政嚴而有緒彬字孟父亦克
孝敬公嘗屬之予曰他日視之曰余故人之子即此子
之榮也公墓在臨淮古城之原銘曰

古大司徒職惇典禮馴擾兆民豈惟會計惟公奮身亦
以豈弟恂恂怵怵爵祿之器先榮後光厯官十年豈曰
其才有德干天豈無人謀不如盛福崇崇其阡臨淮之

杜虎

故元同知邵武路蕭公墓誌銘

元之季世天下四分五裂其間盜名字者無慮千百計
獨閩之陳友定起徒步至列將相百戰守死為元東南
烈士未能或之先也當是時吾鄉豪傑之士多從之崎
嶇嶺海至死不怨而朝廷音問實藉以通先祖太史公
真烈死節事聞贈官先君子亦宣授資德大夫參知政
事詔使來自海上友定遣江君伯昂與俱來且說熊天

瑞于贛伯昂與先公少相善也為其言友定意先公感
激因邀里中士蕭君克欽輩數人俱至贛說天瑞猶豫
先公以太夫人老病不得行伯昂云報命克欽南逾嶺
表間入閩微觀之崎嶇兩淞出金陵轉入巴蜀還寓長
沙歷湘潭以歸與先公謀曰吾觀羣豪智略下獨友定
忠義殆可倚也乃復之閩友定承制授克欽奉議大夫
同知邵武路參其軍事友定用法嚴往往致濫輒為營
解全活甚衆當行兵擊賊入建陽山谷間卒遇千餘人

圍之數重執長刀躍馬奮擊賊首兩人直前來刺將及忽大呼辟易其衆曰且止且止此吾父蕭公也使語之二人跪曰我嘗見獲於君賴公救之得生今雖衆寡不敵我終不敢背德布陣稍却羅拜雲集行建寧光澤道中有七人者執兵而前跪曰生我者公也每思無以為報今幸道經我里敢以白金百兩為從者獻蕭君不識也其人各言姓名及所以營解其生之狀君慰喻却其獻而去洪武元年戊申隨友定至京友定死君以親老

辭不仕歸田里年才四十二事親以孝聞讀書教子自
娛祁寒威暑手不釋卷親戚子弟從學多所造就洪武
戊寅六月二日終于家享年七十二於戲可謂全名福
矣君生元泰定丁卯歲餘親母王氏卒繼母王氏鞠之
愛之逾已出岐嶷不凡幾冠從受書於安成羅先生學
成教授其鄉卓然以不墜其家為念而所以去就卒如
此可謂難也矣余聞之先公常欲為之傳其事今子翰
林檢討引高與余同修太祖高皇帝實錄見友定之事

而歎蕭君之不可作也引高亦感風木奉狀請銘余不敢
辭也按狀君諱寅克欽其字所為文章曰舫中集晚自
謂舫中叟學者稱秋舫先生系出南齊鄱陽王後世居
濟寧有諱忠國者事宋高宗為吉州防禦使子文婚
吉水城西章氏子孫遂為吉水人高祖典簿公文布曾
祖信可祖德永父雲心世積忠厚連姻士族娶艾氏先
卒繼王氏徐氏子男五人長仲高其季金高皆先卒次
即引高次憑高次持高皆能世其家女子三人適士族

孫男子十四人慶榮回父明會弘卒儀益本遵係全曾
經曾孝蒙覩以壽終之歲葬君于邑之仁壽鄉荷塘山
之原銘曰

有偉蕭君世之通儒縱觀四方議其賢愚得所宜歸之
死不回從容進退鐘鼎若違蔬食之甘韋布之溫天錫
壽祉有賢子孫得譽之真身後乃定盍視厥銘惟善無
競

故奉政大夫太醫院使戴公墓誌銘

王汝玉

永樂乙酉冬十一月二十一日奉政大夫太醫院使戴
公卒於浦江故第其孫紹以丙戌年十二月十七日卜
其鄉獨秀山之岡奉襄事焉持前春官大宗伯鄭公沂
狀不遠千里來京師謁余請曰近故以來大夫之沒咸
得乞銘於文章君子述其潛德善行鐫之貞石或揭諸
墓阡或瘞諸幽宅以貽永久先祖考不幸大故而封塋
之石未有其辭不肖之愆何以自追願先生哀而銘之
余辭不容乃按狀敘次為銘公諱思恭出唐平南節度

使銀青光祿大夫檢校太子尚書令諱昭後至公歷廿
有一世曾祖諱濤祖諱暄父諱堯皆隱居不仕素以詩
禮相承稱浦江望族公資篤敏讀書必求聖賢微言與
義為文若詩不尚浮藻務底有用於時暇日於星象堪
輿風鑑之術靡不旁推曲究尤精心軒岐書烏傷之丹
溪朱彥修氏得許文懿公道學正傳學醫于武林羅太
無盡得其秘公先府君蚤從之游繼遣公往執弟子禮
受業其門丹溪一見輒奇之悉語公濂洛授受之懿及

醫學諸家要故以醫道鳴浙東西洪武丙寅三月皇上
龍潛北京嘗患痲聚遣使召公治療刻日奏功晉府親
王邁末疾亦迎致公隨獲異驗厥後晉府訃聞高皇帝
馮怒王國臣僚悉逮赴京時公侍左右從容進曰昔者
臣嘗受知於王飲臣之藥數矣然竊慮其膏粱之毒復
作也今乃果然上於是釋然改容諸臣咸得不坐壬申
七月太祖高皇帝徵公入朝將屬領太醫院事公以老
病辭授階迪功郎職御醫值風雨免朝戊寅夏五月高

皇帝大漸公同列進藥不稱者皆麗于辟獨指公謂侍
臣曰戴元禮仁義人也慎毋恐近臣聞于遼府親王為
書二大字賜公肅慶二府咸為贊詠朝野名卿鉅儒播
之篇翰克物卷帙也皇上正天位超陞今官既就職後
以耄不任事為請弗從至數四乃許之仍賜誥命金帛
致仕歸田里甲申冬十月復命使者乘輅召公伏枕不
起乙酉夏四月以安車入因公衰病免行拜禮優卧官
舍惟特召乃進見是冬十月復請乞骸骨勅十五日吉

治行俾禮部選官護送瀕行諭公曰朕復召汝汝其來也公既抵家出賜金修祀事遍召親故宴飲為樂置殽羞拜丹溪墓載酒造邑中從所知叙平生歡用昭恩賜之隆甫旬餘疾作公自知不治將易簀召諸子姓訓之積善守法具告以不能補報聖恩為身後愧言已而逝享年八十有二卒之明年春二月勅命行人翁綬諭祭于家御製祭文褒獎至備具載國史公歷事兩朝藥餌所施奇效不可殫述金繒楮幣上尊珍饌駢蕃之賜殆

無虛月公平生亦誠慎寅畏未嘗少有過差是以遭逢
眷知終始一致自古迄今士之榮幸蔑以加焉蓋公之
學出於丹溪丹溪之學源深而本固非近世醫家者流
所可比余曩得其書讀之爰自易水張氏河間劉氏東
垣李氏曠百載沂而上焉極於素問靈樞宗旨推天人
交合之理辯陰陽偏勝之氣其識卓以明其說詳以密
以故見之於用能起死回生動若神助一洗拘方泥法
之陋誠儒者格物致知之急務也公以所得於丹溪者


觸而伸之類而比之研精覃思明體適用宜其遇病施
治若矢發機必中正鵠彼不善為射徒袖手操弓莫知
攸措焉公今已矣後之人能知丹溪之學者皆公有以
倡啓之也公娶諸暨楊氏生子男二曰儒曰儼皆先公
卒孫男四孫女四其請銘者長孫也銘曰

二氣流幹天清地寧人於其間稟茲粹精苟或滯焉灾
疢以成學喪千載彼昏孰醒匪有先覺疇探其情金元
之際羣賢迭興貫道三才窮玄洞冥後丹溪氏遺緒是

承載闡微言大宏厥聲公遊其門擷華纂英皇皇聖世
以醫自鳴際遇兩朝丕膺寵榮公雖已矣不死猶生垂
範後學識是夷行濟危扶殆有則有程獨山之原閔是
泉局過者必式視此刻銘

明文衡卷八十五

謹案卷八十四第七頁後六行興通舊作興童今
改十一頁後七行博拜舊作寶寶今改



總校官庶吉士臣張能照
校對官編修臣閔惇大
膳錄監生臣楊星

欽定四庫全書薈要

集部

明文衡卷八十八

六至



詳校官候選知縣臣吳甸華

欽定四庫全書薈要卷二萬二百三十九

集部

明文衡卷八十六

明 程敏政 編

墓誌銘

故奉議大夫浙江提刑按察僉事劉公墓誌銘
胡廣

國初廬陵諸君子仕於朝其聲光炳耀卓然為時所稱
譽者無慮數十人而劉公季道其一也公以明經被薦

初拜起居注遇事知無不言竭盡誠悃首發御史大夫
陳寧奸深為上所信重嘗隨駕幸中都度清流關上賦
詩命百官和公獨先就有治定不教生縱逸功成猶遣
歷間關之句上覽之曰有安不忘危之意賜白金二十
兩綵段二端未幾拜浙江提刑按察僉事決積歲治獄
六百餘起有牽於文繫者平反尤多民以無冤咸嗟服
之此其卓然有聲稱者竟為陳所銜傅致其死時洪武
六年月日得年四十有九公諱宜正季道其字其先沛

人唐末自沛官袁五季之亂由袁徙吉居永豐瀟溪曾
祖諱某兩領宋漕舉授新淦縣丞祖諱某恒山縣令父
諱奇相元至治癸亥領鄉薦為東湖書院山長吉安路
儒學正撫州路儒學教授母張氏公居幼穎敏過諸兄
八歲隨父居東湖讀書聲琅琅聞于外賓客往來應對
閑習人多譽之九歲喪母哭泣逾哀十三喪父居喪毀
瘠不勝始事鄉先生劉惠心繼從山泉解先生二先生
咸異之時郡守開堂試公年十八就試中高等獲綵綺

二既而持所學試于有司再不利有得其文讀之曰如此而見擯斥命也季道奚辱公曰吾學未至耳非有司病吾元季天下繹騷其友梁某為福建招討託致其母扶持兵革間出艱難致其母子相見某拜公曰微公其孰能致吾母終身不敢忘德嘗與姻戚居逆旅忽得疾公親為調藥餌既死公抱之而哭解衣葬之所遺金悉以歸其子兄弟四人長皆先沒惟仲兄存公迎至家養之比其沒葬祭皆盡其情無子以次子為其後公娶邑

曾氏賢而有婦行自公沒惟以教子為事子三人長曰忠次曰勗幼曰肅字子欽子欽登永樂二年甲科為名進士入翰林為庶吉士其文學為儕輩所推讓女一人適某孫男九人女二人距公沒三十餘年將卜葬于某山之原子欽始以狀來請銘謹按狀而銘之銘曰

嗚呼劉公挺然之英政事文章焯有時稱發奸之言揚于大廷巨蠹一聞膽落魄驚諷辭戒逸治定功成至誠有動錫賚寵榮載歷風紀激濁揚清事有失頗公執其

平伸抑理枉獄無歎聲奸臣銜公頃不忘情傳致公死
惡害公生生有不沒死則公寧公天既定彼奸曷勝以
礫以裂天子聖明公憾既釋烈日薄冰彼奸鬼蜮公猶
列星有燧其芒南極長庚伊彼鬼蜮稔其穢腥有北豺
虎以莫不憎公有令子式克繼承以昌家學甲科聿登
庶或在茲報公冥冥有封如堂以妥公靈爰伐貞石鑱
不朽銘百世之下斯文是徵

羅公矇叟墓誌銘

我太祖高皇帝乘運龍興文武智謀之士四方雲集各

獻其能芟薙暴橫肇建洪業偽漢逞兇殲于鄱陽其子

理潛歸武昌上不欲窮兵乃遣儒生掉三寸舌以說之

廬陵羅復仁承命往說說下完城不費一矢雖其口舌

之功而實本於太祖不殺之仁有以致之也復仁質直

遇事敢言以是功授弘文館學士後賜休致于家其從

子養蒙好言語持辯論侃侃無所避人謂有其從父風

而文學或過之羅氏代有其人養蒙諱以明養蒙其字

自號曰矇叟。幼知慕學家。貧母鬻簪珥以教之。七歲善聲對。十二三能為辭賦。及冠為童子師。常得肉味。輒先以奉親。所得一毫不自私。元末兵亂。值大父母及父三喪。竭力盡喪葬。不以貧窶廢禮。一日假館新淦。忽心動亟回家時。母遘疾甚危。即禱天請以身代。母竟死。更二日復甦。謂曰。適有神人告我云。更與汝壽五齡。人皆謂公孝誠所感。母後果五年而沒。母沒哀痛幾絕。終喪如一日。自是遇歲時祭奠。必泣下沾襟。鄉人見者莫不稱。

歎故公之行有以服人雖寇盜聞公言皆感愧不復為攘竊國初有勉公仕者公曰我逢聖朝為太平之民謳歌田野以樂治化教子課孫以報覆育之仁吾老矣無能為矣今天子即位改元永樂其中子汝敬領鄉薦明年上春官登進士第入翰林為庶吉士陞修撰皆公之教也汝敬嘗迎公來就養公時猶康強朝上于奉天門見皇太子于文華殿特加問勞命大官賜膳人皆榮之已而辭歸詞林士大夫多為詩歌餞送于都門外觀者

咸嘖嘖加羨公歸鄉惟日賦詩歌頌太平間以書勉其子惟盡忠孝年已八十六耳目聰明飲食無異平時一旦脩然而逝永樂壬辰十一月廿三日也生故元泰定丁卯月日曾祖德茂元瑞州學正祖仲哲父時中俱博學有文章母蕭氏配蕭氏再娶李氏俱先歿子男七人曰忍曰德曰盈曰恭曰肅即汝敬曰仁臨江郡學訓導忍德先卒盈為復仁後孫男若干人孫女若干人曾孫男某曾孫女若干人以某年月日葬于鄉某山之原汝

敬以右春坊右諭德兼翰林侍講金公幼孜所述行狀
泣請予銘予生也後嘗忝與公有文字之交且辱相知
詎可以辭況公平生學問操履出處大槩表表可稱至
其事親誠孝感動神明此猶可書謹按其實而銘之銘
曰

羅氏之先始出錢塘有行其支乃遷豫章奕葉廬陵復
蕃吉水桃林之墟蔚蔚嶷嶷科第相望寶祐迄今有暉
高曾襲其簪纓猗歟矇叟式承家學以孝事親質神無

作士服儒紳八十六年鶴髮童顏飄然若仙逍遙林壑
優游卒歲他人天爵公獨良貴公今逝矣以反其真九
原不作永閔斯文

王竹亭先生墓誌銘

楊士奇

國朝混一之初天下耆儒碩師往往多在徵詔數下或
進而階顯融佐化理或退而信廉節成後進皆卓然有
益於世也是時泰和王竹亭及其弟子啓兩先生正學
篤行高風直節表表乎大江之西洪武二年子啓先生

首舉明經為監察御史明年竹亭先生以說書徵既至上書論事更授福建鹽運副使以老得辭子啓先生後陞廣西按察僉事又擢知崇慶州政治赫赫已而罷歸時竹亭先生春秋六十餘子啓先生亦幾六十伯仲恭愛隆然居必一堂出必雁行長身玉立儼乎端恪魏冠褒衣襜褕甚偉蓋望之如神人無不肅然起敬畏者至其接人色莊氣溫雍容怡如語簡理盡無不樂就之焉竹亭先生諱沂字子與竹亭其別號幼讀孟子即知辯

於義利稍長刻厲學問嘗從元進士楊升雲彭復初治周易造其室與自六經至於周程朱張之書靡不深究及子史百氏咸旁通博考蓋於天人之微聖賢之蘊往古治亂成敗之故蓄之富察之審言之的而履之確也嘗一試有司不合即不復出教授於其鄉而所交游往還皆當世名人元季江西參政綽班薩里駐守贛州禮遇先生辟為行省照磨又承制授吉安路治中俱不受逮皇明龍興洪武三年廣東行省聘考貢士試是年侍

御史吳去疾言泰和王沂經學操行宜在侍近遂徵為
說書至未幾而歸益以成就後進為務從學者愈衆傾
竭底裏隨其材而篤之而皆有成先生資識高明內貞
外和氣度弘偉規範自然安成進士劉雲章嘗贊之曰
淵乎玄酒之在尊漂乎太阿之未出匣嚼乎其清而挹
之弗竭薰乎其和而即之弗可狎又曰使及門孔氏則
風雩之詠歸端章甫之禮樂固將進退綽然而特視其
所合蓋確論也先生孝友篤至歲時葬祭循古禮燕處

必嚴未嘗啓口及人過失有文集若干卷承旨宋公濂
為之序詩若干卷襄城楊伯謙序之洪武十六年某月
某日卒年六十有七王氏世有德義其先出晉司徒導
之後由金陵來徙至宋戶部侍郎贊顯于仁宗朝事載
郡志又若干世至圭為榮王府賓客與周文忠楊文節
皆善學者稱虹溪先生虹溪若干世至性夫性夫子以
道元李韓公復嘗薦之以親老辭二子先生兄弟也先
生娶陳氏繼李氏皆有賢德子男一伯貞舉明經累官

瓊州知府女一嫁嚴玄齡孫男二信直直舉進士為翰林修撰曾孫男八女三先生初葬于秋鄉大徑之原至是瓊州公丁李夫人憂改葬先生新山之原使直屬士奇銘墓士奇蓋生晚不足究知萬一然念鄉人老長識先生者盡矣當時門人親受教者亦多不在將使後之學者有志乎先進其何所考法也且士奇於王氏重世好又少嘗侍教先生兄弟及瓊州公矣故不敢辭不敏不銘謹述其所知大槩而為銘曰

奕奕王山澄江洋洋猗歟先生邦人之望江山出雲雨
于下土君子之道有畜不施道之傳矣孰不為材佐理
于隆濟濟偕來世其遠矣後來何師猗歟先生昌究予
思

故少師吏部尚書贈特進光祿大夫太師謚忠
定襄公墓誌銘

宣德十年正月十有五日少師吏部尚書襄公薨于位
先四日以疾聞上遣太監范弘以醫來視賜鈔萬緡明

日范太監以衆醫偕來又明日疾革范復來問所欲言

對曰陛下初嗣大寶義獨寡祐不能效分寸裨益然區
區犬馬之誠所望於聖明者惟敬守洪武成憲始終不
渝耳言已而絕訃聞上深悼歎屬時國有大事悉停諸
祀特賜鈔萬緡勅工部治喪葬贈公特進光祿大夫太
師謚忠定遣某官某賜祭而官其長子英英等奉親歸
葬有日求余為銘余與公同朝三十有五年而事仁宗
皇帝自登儲至大位始終皆陪公公國家老成人所以

啓益士奇蓋多不敢辭寒氏世家重慶之已縣宋以來
多顯仕自公高曾而下始隱居不出曾祖繼祖妣牟氏
祖均壽妣雍氏考源斌妣胡氏繼羅氏以公貴贈曾祖
祖考皆榮祿大夫少師吏部尚書曾祖妣祖妣妣皆夫
人公諱義字宜之生而岐嶷長端重不好弄而嗜學弗
懈始從里社師中書左丞巖哲時為郡守一見異之引
充郡學弟子員語其師曰是兒將來遠到非吾所及當
成就之而公不煩程督日益有進洪武甲子中四川鄉

試明年中禮部會試廷試賜同進士出身擢中書舍人授徵事郎見重太祖高皇帝每前奏事率稱旨而數見獎賚初名瑤一日奏事畢問汝蹇叔之後乎親灑宸翰書義字賜之以易舊名時丁羅夫人憂賜道里費且命馳驛歸蓋特恩云服闋仍舊職滿三載吏部奏當調特命終九載朝夕左右凡機密文字必以付公而小心敬慎久而愈篤建文中陞吏部右侍郎授嘉議大夫太宗文皇帝入正大統轉左侍郎數月陞吏部尚書授資善

大夫時政令制度有非洪武之舊者詔悉復之公從容
為上言損益貴適時宜間舉數事陳說本末文皇帝以
公忠實悉從其言小人有譖公不忘建文者賴上聖明
不聽有除官不得善地訴公不公者上皆斥之永樂二
年冊仁宗皇帝為皇太子命公為詹事時師傅皆以勲
臣兼之而輔導責任文臣詹事蓋元僚也上欲有諭皇
太子率諭詹事往導意公亦委曲周悉皇太子尤愛重
公所言靡不信用滿三載陞資政大夫七年車駕巡狩

北京命皇太子監國中外庶務惟諸王及遠夷有奏請詣行在餘悉啓聞處分公熟於典故達於政體孜孜無倦不動聲色而事賴以濟賜語以其官秩封贈三代滿九載賜勅有秉心正直及淳良篤實裨益國家之褒數奉命兼禮部事雖職務填委處之裕如十七年丁父喪歸上及皇太子皆遣官賜祭皇太子贈賻尤厚有詔起復公詣北京謝上慰勞再三賜鈔千緡遣中官護送歸南京明年從皇太子朝北京遂命公巡撫直隸應天等

府州問兵民休戚及文武吏之賢否而升黜之公謂國家多事之際悉以法繩吏人將不勝特黜其太甚者數人餘多見寬假而兵民利弊當興革者具奏行之仁宗皇帝初嗣位一切政議預者三四人而公居首進少保兼吏部尚書二俸俱支賜冠服象笏及玉帶二遂進少傅及進少師賜師傅之臣銀章各一其文曰繩愆糾繆公首被賜上諭之曰朕有過舉卿即具疏用此封識進來蓋望公等匡直也繼賜誥授榮祿大夫封贈三代及

妻於公數人誥詞上特增曰勿謂崇高而難入勿謂有所從違而或怠所以望公等者甚切也又念公侍從監國舊勞特製褰忠貞印賜之而賜勅有以善翊君勞心焦思二十餘年夷險一節之褒時修太宗皇帝實錄命公監修宣宗皇帝嗣位一切政議屬公數人如仁考之初繼奉命監修仁宗皇帝實錄書成賜白金文綺鞍馬扈從征庶人高煦還寵賚尤厚復從巡邊既還以公年老不欲煩以有司之務賜勅曰卿事祖宗積效勤誠朕

嗣統以來尤資贊輔夙夜在念圖善始終蓋以卿春秋
高尚典劇司優老待賢禮非攸當況師保之重寅亮為
職不煩庶政乃副倚毗可輟吏部之務朝夕在朕左右
相與討論至理共寧邦家其專精神審思慮益致嘉猷
用稱眷倚老成之意繼賜銀章一其文曰忠厚寬弘蓋
以褒德云賜新第於文明門內寵錄淳加吏部言公歷
少師九載降敕褒諭仍賜宴禮部是歲生旦賜鈔萬緡
廐馬一匹今上嗣大位之日賜白金文綺是夕齋宿於

公得疾越五日竟不起享年七十有三公為人沈深質實和厚簡靜內有孝友之行事君有誠處人有量無所拂逆未嘗輕涉一語傷物至於議法亦不苟為包含必歸中正歷事五朝凡五十年所履坦坦無一日顛躓之憂退朝之暇手不釋卷貴而能謙富而能約上前所言未嘗退以語人蓋天下有陰被其利者矣士奇嘗竊論之魯簡肅之忠實不欺李文正之不為傷人害物張忠定之不嗜玩好傅獻簡之遇人以誠范忠文之不設城

府公蓋兼有之矣元配劉氏繼張氏皆封夫人子男四
長英次芳次芸次荃英荃皆尚寶司丞荃先卒女二長
適馬駿次適李成孫男四霖震霑露女一公之葬以薨
之歲某月日墓在巴縣某鄉某原先塋之次銘曰

節乎蜀山浩乎蜀川孕精毓靈挺生偉人溫中穆外履
夷蹈素皇明麗天奮躍自下在帝左右秉恭與誠掌帝
之制播告四方進貳天官遂職冢宰簡用俊良往興至
理帝命淳隆俾輔聖儲陳厥謀謨聖罔弗俞四紀在廷

三翼升御肅肅師臣秉王之度一念惟仁永矢不渝寅
畏小心保終猶初陰利逮人人則罔覺惟帝昭明褒詔
有數嗚呼忠定維國老成昌不憖遺翼我聖明生榮死
哀死且不朽昭德刊辭永告爾後

故少師工部尚書兼謹身殿大學士贈特進光
祿大夫左柱國太師謚文敏楊公墓誌銘

正統五年二月十八日少師工部尚書兼謹身殿大學
士建安楊公奉勅歸展先墓既畢事卜日啓行病作衆

曰曷俟少間公曰君命不敢稽也挾醫以行至臨安武林驛病加遂不起是年七月二十也守臣治棺斂既馳奏皇上嗟悼輟視朝一日贈特進光祿大夫左柱國太師賜謚文敏遣禮部尚書胡濙莅祭遣中使護喪還葬其鄉命有司治墳公先世見余譔其大父墓碑曾大父伯遜大父達卿父伯成皆贈榮祿大夫少傅工部尚書兼謹身殿大學士曾太母黃大母謝繼阮母劉皆贈夫人公初名子榮字勉仁自學諸生鄉試選第一會試第

三廷對擢第二甲賜進士出身入翰林為編修太宗皇帝入正大統更其名榮初建內閣簡翰林之臣七人其中專典密務七人者解縉胡廣黃淮胡儼金幼孜公及士奇也公齒最少最警敏一日晚上出右順門召內閣諸臣獨公一人在出江西三司奏章示之言吉安鄉民之嘯聚者已悉復業蓋朝廷初有聞即遣行人許子謨齎勅撫諭子謨行將一月又遣都督韓觀率兵繼之如撫諭不下即加兵及是奏至上諭公曰觀不至不下其

降勅褒觀公讀奏訖對曰計發奏之日觀尚在中道未

足褒從之自是益重公時四方之事方殷七人者旦夕

侍左右承顧問受旨退治職務且兼稽古纂述之事不

虛寸晷上時步至閣中親閱其勞且視其所治咸稱旨

時公尤勤勵遂皆進官公進修撰數月復進侍講明年

改元永樂秋公請告歸省又明年春七人皆賜二品金

織衣且勞之曰天下事成朕與若等同計非若六卿之

分理也無幾簡翰林之臣十數人兼春坊官任輔導公

兼右春坊諭德授奉訓大夫日分直進講經史四年春
公得寒疾命中官以御醫來視賜藥物五年奉命往甘
肅同總兵議邊務察視守備還奏稱旨六年夏喪父給
傳歸既葬遂命起復是年冬喪母公奏歸守制時已下
詔巡守北京不許七年春內閣胡公及公金公奉命扈
從北京甘肅總兵何福奏降人托克托布哈等率部來歸
命公往同福處置還奏上悅遂奉命持節往額齊訥之
地封福為寧遠侯八年春車駕北征布尼雅錫哩公三人

仍扈從至驢駒河命公先齎勅還報皇太子復還北京
冬扈從還南京九年春奏奔母喪遣中使護送既還皇
太子命公侍諸皇孫學且命公曰嚴則有成公盡心不
怠重修高皇帝實錄命胡廣胡儼黃淮及公為總裁十
年二月賜誥命并追贈父母妻冬甘肅守帥西寧侯宋
琥奏叛寇婁達袞逃居齊欽蒙古衛將為邊患時豐城
侯李彬鎮陝西遂勅彬率師勦之且命公往與彬計度
十二月還奏餉道險阻今沍寒人疲馬瘠不可行且小

醜不足以煩王師遂勅彬旋師無幾叛者復歸十一年

春從狩北京十二年三月從征衛拉特時皇長孫侍行上

命胡金及公三人凡行營有暇即與講析理義開其聰

明尚寶司官闕命公兼之既還勅翰林修性理五經四

書大全公三人皆為總裁十四年陞翰林學士仍兼庶

子扈從南歸十五年春復扈從巡北京十六年夏進高

廟實錄賜宴賚胡公沒公掌翰林院事益見親密一時

廷臣狎恩多縱忌公抗直發其私適太學闕祭酒衆共

舉公實欲疎之上不聽公遂密言十弊指斥五府六部
都察院章留中不下十七年進文淵閣大學士仍兼翰
林學士授奉政大夫十八年扈從北征秋還京冬將西
征親藩奏建文中江西所採集民兵可徵用出奏示公
公對云陛下命復民業二十年矣今復徵非信上曰朕
意固如此遂寢三殿災公偕金公陳便宜十數事皆見
施行重賢愛民或陷非辜必援之尚書夏原吉以兵餽
不給坐繫呂震言其柔姦侍讀李時勉嘗論事亦有言

其賣直者皆激上怒公悉委曲為之辯解二十一年秋復扈從西征駐蹕萬全一切軍務悉付公掌寧陽侯陳懋奏番王額森托噶來歸命公往議定降歸奏稱旨廿二年復從北征中道軍餉不繼上聞之命公與金公總計其數遂如二公言遣使諭寇釋其弗臣之罪下令班師浙江三司奏處州之麗水福建之政和山寇劫掠請勅兩都司合兵討之公言愚民為有司所苦出不得已兵出即良民先被害願遣一勅使撫諭之不足煩兵上

從之卒如公言無事一日上從容坐帳殿諭公二人曰

東宮監國久熟政務此歸悉付以天下事吾惟優游莫
年二公共對曰皇太子孝友仁厚天下屬心允稱陛下
付託上悅師次榆木川上不豫既上賓凡沐浴襲奠飯
含棺斂一切之禮悉出二公衆遂推公先馳歸報既至
同尚書蹇公等議喪禮遂議即位禮仁宗皇帝嗣位進
公太常寺卿授嘉議大夫仍兼兩職學士逾月進太子
少傅授資善大夫兼謹身殿大學士山陵事殿太監孟

繼極言公盡心喪事上嘉歎即陞公工部尚書仍兼前

二職賜勅褒諭三俸俱支尚書一俸全給米洪熙元年

賜誥贈三代考妣無幾上命範白金為方寸印四枚其

文曰繩愆糾繆以賜師傅公與金公同受其一皆期之

直言匡輔修文皇帝實錄公預總裁仁廟上賓時皇太

子監國南京遺詔召嗣位公往迎於德州既還命公同

有司相陵地宣宗皇帝嗣位修仁廟實錄仍預總裁高

煦反在廷多懷二心惟文臣三四人勸上親征公其首

也遂扈從討平之師還特受駢蕃之賜馬騏驎變交趾
黎利聚衆抗王師總帥孱弱不支輒與利和且為利請
立陳氏後遂以師還奏至上以示文武大臣皆勸發兵
擊利上不聽竟偃兵息民公有力焉是年八月車駕巡
邊至遵化聞敵逼塞下以道隘師難並進上率鐵騎數
千先馳擊之文臣獨公從既還陞少傅進榮祿大夫仍
兼尚書大學士三俸俱支辭大學士俸進兩朝實錄賜
宴賚又範白金為圖書刻方直剛正四字以賜公數月

上念先朝老臣蹇義等四人皆春秋高並賜勅褒諭命
輟職務朝夕左右侍論議公預焉賜玉帶加有御製詩
畫之賜公滿三載吏部以聞賜勅有忠言讜論裨益為
多之褒賜宴禮部遂賜少傅誥進封三代後兩扈從巡
邊皆至洗馬林而還宣廟上賓公復偕有司相陵地皇
上嗣位公與同官三人協志合力以効裨益賜賚特厚
修宣廟實錄皆為總裁書成進公光祿大夫柱國少師
兼尚書大學士如故賜玉帶時上日勤聖學命公同知

經筵事五年謁告省墓賜勅褒諭加厚賚給傳遣中官護送既還京道薨春秋七十公仕於朝四十年皆居清密考鄉試者一讀廷試卷九為人聞疏果毅遇事當為奮前不疑於論古人必欲出新見不肯苟同議辟率歸寬恕勤職事盛寒暑及小疾未嘗少怠於四方裔邊徼事及邊將勇怯智愚靡不通知故忖量事勢率豫中內薦孝友睦婣之行家故豐裕且有厚祿能濟窮恤患無間疎戚喜賓客善交際雖貴盛無崖岸貴賤小大皆歸

心焉故聞其沒也咸有嗟咨悼惜之意所著文章有默
菴集雲山小藁靜軒藁退思集北征記訓子編藏于家
元配劉贈夫人繼劉封夫人皆里處士仲穆之女子男
六恭讓錫賜貴芳貴通女七兵部主事雷潛詹鎔陳順
德蘇潤其壻也餘在室孫男十二奏儼倫俊儉佶儼佐
綜偉倬儀女七曾孫女二皆在室士奇與公同僚三十
有九年同事四聖今內閣舊臣惟吾兩人未能退公又
溘先余逝公之葬其子屬少保楊公書墓上之石余銘

諸幽嗚呼凡今能文士大夫感公之德述公之行雖有
之矣若交之久知之深言之信者余兩人其庶幾可無
愧也銘曰

桓桓文敏通才博識遑際聖明光奮于績承明延閣著
作之庭以翔以翔舒華振英北裔西陲從狩萬里職典
者文亦兼知武羌部胸臆帥垣弱強重瞳屢顧敷奏惟
明晚陟三孤貳公弘化恪恭朝夕敢或遑暇帝懷敷仁
鞠躬承之民懷被福黽勉成之志存寬惠行在果斷嘉

謀謹議褒書有煥予告南旋曾幾何時上下延佇而訃
奄來越昔內閣七人同事荏苒三紀我銘其四公壽考
終哀榮寵光於乎文敏歿也不亡

明文衡卷八十六